

Ai 3 di avost
INTE DISCUVIERTE DI S. STIEFIN, PROTOMARTAR
Protetôr de Diocesi di Conguardie - Pordenon
Solenitât

San Stiefin, un dai siet diacuns de Comunitât apostoliche, al fo il prin a testemoneâ cul sanc la proprie fedeltât a Crist. La sô passion e je contade intai Ats che lu presentin come om «incolm di gracie e di virtût» (At 6,8). La discuvierte des sôs reliuiis dal 415 e impressionà une vore il popul cristian che al slargjâ la devozion dal sant intai contors. Une vore di glesiis a forin dedicadis al so non, comprendude la seconde catedrâl di Conguardie, dopo de distruzion probabilmentri da bande dai Uns.

Antifone di jentrade

Si son spalancadis denant di san Stiefin lis puartis dal cîl
e lui si è cjacat par prin te schirie dai martars
e cussì al trionfe in cîl coronât di glorie.

Si dîs Glorie a Diu.

Colete

A nô, che o celebrin, Signôr,
la solenitât di chel che al à savût preâ ancje pai siei persecutôrs,
danus la gracie di imitâ chel che o stin onorant
e di imparâ a volêur ben ancje ai nestris nemîs.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spiritu Sant,
par ducj i secui dai secui.

PRIME LETURE At 6,8-10; 7,54-60

O viôt i cîi spalancâts.

Dai Ats dai Apuestui

In chei dîs, Stiefin, incolm di gracie e di virtût, al faveve miracui e spiei di chei grancj framieç dal popul. Alore un trop de sinagoghe, che ur disevin dai “sfrancjâts”, int di Cirene, di Alessandrie e altris de Cilicie e de Asie si meterin di mieç e a scomençarin a contindi cun Stiefin. Ma no rivarin adore di tignîi teste a la sapience e al Spirit che lu faveve fevelâ.

Sintintlu, ur vignive sù la rabie e a crustavin i dincej cuintri di Stiefin.

Plen di Spiritu Sant, lui al cjalà sù fis viers il cîl e al viodè la glorie di Diu e Jesù in pîts a la sô diestre. Alore al disè: «O viôt i cîi spalancâts e il Fi dal om in pîts a la diestre di Diu». Petant grancj berlis, si stroparin lis orelis e si butarin intor di lui; lu sburtarin fûr de citât e si meterin a clapadâlu. I testimonis a poiarin i lôr vistîts dapît di un zovin di non Saul. E intant che lu claponavin, Stiefin al preave cussì: «Signôr Jesù, cjol la mîe anime». Po si pleà sui zenoi e al disè a fuart: «Signôr, no sta metiur in cont chest pecjât». E cun chestis peraulis, si indurmidî vie.

Peraule di Diu.

SALM RESPONSORIÂL dal Salm 30

R. Signôr Jesù, cjol la mîe anime.

Slungej viers di me la tô orele:

anìn svelt a liberâmi;

viôt di jessi par me une crete che mi pare,
un ripâr là che nissun nol rive a cjapâmi. **R.**

Tes tôs mans o met la mîe vite;
sfrancjimi, Signôr, Diu di peraule.

No vuei viodi chei che a corin
daûr di dius che no son nuie,
jo tal Signôr o ài metude la mê fede.
O vuei gjoldi cjantant il to boncûr. **R.**

Fâs lusî la tô muse sul to famei;
salvimi pal to boncûr.
Tu mi platis a l'ombre de tô muse,
lontan des palissis dai umign. **R.**

SECONDE LETURE Rm 5,1-5

Si vantìn parfin tes tribulazions.

De letare di san Pauli apuestul ai Romans

Fradis, justificâts pe fede o sin in pâs cun Diu midiant dal nestri Signôr Jesù Crist. Midiant di lui o vin vude ancie la jentrade, pe fede, in cheste gracie che si ciatin e si vantìn te sperance de glorie di Diu. No dome, ma si vantìn parfin des tribulazions, savint che la tribulazion e fâs nassi la pazience, la pazience une virtût provade, la virtût provade la sperance. E la sperance no lasse malapaiâts, pal fat che l'amôr di Diu al è stât strucjât tai nestris cûrs in fuarce dal Spirtu Sant che nus è stât dât.

Peraule di Diu.

CJANT AL VANZELI cf. Sal 117,26.27

R. Aleluia, aleluia.

Benedet chel che al ven tal non dal Signôr;
e splent sore di vualtris la lûs de sô muse.

R. Aleluia.

VANZELI Mt 10,17-22

No sêis vualtris che o fevelais, ma il Spirt dal Pari vuestri.

Dal vanzeli seont Matieu

In chê volte, Jesù al disè ai siei dissepui: «Stait vuardâts dai oms: us consegnaran ai sinedris e us flagjelaran tes lôr sinagoghis; o sarêts strissinâts denant dai governadôrs e dai rês par colpe mê, par che o dedis testemoneance a lôr e ai paians. Se us consegnaran tes lôr mans, no stait a bacilâ di cemût o di ce che o vêts di dî. Us sarà ispirât in chel moment ce che o varêts di dî; parcè che no sêis vualtris che o fevelais, ma il Spirt dal Pari vuestri al fevelarà in vualtris.

Il fradi al consegnarà a muart il fradi, e il pari il propri fi; i fîs a jevaran sù cuintri dai gjenitôrs e ju fasaran murî. O sarêts odeâts di ducj par colpe dal gno non. Chel che al varà tignût dûr fin tal ultin, chel si salvarà».

Peraule dal Signôr.

Si dîs O crôt.

Su lis ufiertis

Acete, Signôr, i regâi che ti ufrin
tal ricuart gloriôs di san Stiefin
e conferminus in chê fede
che lui al à testemoneade cul so martueri.
Par Crist nestri Signôr.

Antifone a la comunioñ At 7,59

Instant che lu claponavin, Stiefin al preave e al diseve cussì:
Signôr Jesù, cjal la mê anime.

Daspò de comunion

Diu, che inte fieste di san Stiefin
tu nus âs clamâts a vê part di cheste sante taulade,
memoriâl de muart di to Fi,
conferme in nô la vore dal to boncûr
e trasforme la nestre vite intun ringraciament che nol finìs plui.
Par Crist nestri Signôr.